

Narator: Deniza Jovanovikj (Liaku)  
Transcriptsii: Iana Mihailova

Azã va vã spun unã pãrãmit tsi nju spunea a mea mai Yiulia Beaca cãndu iram mini njicã featã, shi multu u vream aestã pãrãmiti. Pãrãmitea s-cljeamã Ciungiulj Mangiulj tu oalã, moasha cu aushlu nafoarã.

Tsi sh-ira, tsi nu sh-ira!

Ira unoarã un aush cu unã moashi. Nãshi nove fumelji, nove tsiva, bãna singuri shi ira orfãnj. Moasha unã dzuã bãgã s-adarã unã pitã cã al aushlu ãlj si mãca multu sh-ira agiun. Cu tsi s-odarã pita, s-minduea! Apofusi s-odarã, cu curcubetã cã aushlu u vrea nai ma multu! U lo curcubeta, u bãgã pi unã scãndurã shi u disicã cu tsupata. Curcubeta s-disicã pi trei pãrtsã, cãndu, tsi s-veadã! Curcubeta amplinã cu shoarits. Cum inshirã shoaritslji, acãtsarã, s-ascumsirã tu guvi. Mash un njic, nai ma njic shoaric, nu putea s-intrã tu guvã shi s-ascumsi dupu ushi, sum metura di arniri. Moasha adrã pitã, u dusi la cireap, s-coapsi sh-odusi acasã nãpoi. U bãgã sum sofrã, u plãscãni cu apã aratsi ta s-u ducã la dada-sa, ashi spunea di ninti aushlji cãndu iram io njicã. Cã aushlu sh-moasha nove dintã shi s-nu s-upãreascã caldã s-u mãcã pita shi s-nu hibã uscatã. Shidzurã s-mãcã, cãndu, sh-atsea tsi armasì, shi u scularã sofrã, bitisirã cu mãcarea. S-dusi moasha s-u ljea metura di dupu ushi, s-arneascã sãrmili di pita. Cãndu, sum metura, lu vidzu shoariclu ascumtu. Atsel mãratlu s-trimbura ca veargã di fricã. A moashiljei i cãdzu jali sh-lu featsi shoariclu fumealji. Ilj bãgarã numa Ciungiulj Mangiulj. Tricu chiro shi bãgarã un gãrnu s-hearbã ti la bisearicã, tu unã cãldari mari. Tu unã mari, mari cãldari. U bãgarã pi foc shi s-dusirã la bisearicã. Ancljisirã usha cu cljeaia, shi ilj dimãndarã a Ciugiuilu s-measticã cu lingura marea, cu ciubana. Nu cu njica, s-nu cadã nuntru, cãtse ira cama njic. Cãndu s-turnarã, striga, striga, vãrnu nu disfãtsea usha. De, de, de, dedirã cu unã fortsã shi u pimsirã usha, intrarã acasã. Ciungiuilu nu lu avea iuva. Nove cai s-lã disfacã usha. Shi cãftarã pi tuti pãrtsãli, ama nu-l avea nãs iuva. Cãndu lu aftarã tu cãldari. Cãndu, vidzurã, mistica cu lingura njicã sh-cãdzu nuntru shi s-vãtãmã. Dusirã, l-ongruparã shi di atumtsea, moasha cu aushlu armasirã jilits shi singuri. Ashi ira, aestu pãrãmif bitisi.